



# Swi kulu eka mina!



Sipho R. Kekezwa





Mundzuku i siku ro sungula ra Xivono exikolweni.

“Xana u ndzi xaverile swiambalo swa xikolo, manana?” a vutisa hi ku hiteka.



“Loko u heta ku dya, u nga vona yunifomo ya wena ya xikolo,” ku vula mana wakwe a ri karhi a kombetela xibutsa xa swiambalo lexi a xi ri ekusuhi na tafula.

Xivono u djile swakudya swa yena, a nga ti vonangi na tikherotsi leti a nga ti tsakeleki epuletini ya yena.



Xivono u tlurile ku suka eka xitulu xa yena loko a heta ku dya, a sungula ku hanguluxa swiambalo.

“Swiambalo swa mina swi kwihi?” a vutisa, a ri karhi a khoma swiambalo hi xin’wexin’we.



Swiambalo hinkwaswo swa xikolo a swi languteka swi ri leswi kulu eka yena.

“Swi ringeti,” ku hlohlotela manana a ri na ku n’wayitela exikandzeni xa yena.



Loko a huma ekamareni leji a ringetela eka yona swiambalo swa yena swintshwa, boti wa yena, Vonani, a ri karhi a hleka.

Tata wa yena a n'wayitela a ti pfarile hi phephahungu leri a ri eku ri hlayeni.



“I swi kulu eka mina!” a vula hi rito ra le hansi ro rila.

“U nga vileli n'wananga. Ndzi ta ku lunghisela swona. Mundzuku, u ta va u sasekile.”

Xivono a nga n'wi twisisanga mana wakwe , hikuva a tsandzeka ku famba hi swona.



Xivono u kunguhatile leswaku a nge yi exikolweni.



U yile eku etleleni a tshovekile mbilu ni ku va ni xivono xo hambana xa siku ra yena ro sungula exikolweni.

A ha ehleketa hi swona loko a khoma hi vurhongo.



“N’wino, loyi u ambarile tintanghu ta tata wakwe,” ku vula mufana lonkulu exikolweni a byela vanghana va yena, a ri karhi a kombetela Xivono.



“Hembhe ya yena onge i rhoko,” ku vula un’wana.

“N’watiburuku,” ku engetela wa vunharhu.

Xivono u lo kota ku khoma mihloti ya yena, loko vana van’wana va ri karhi va n’wi sondzolota exikolweni.



Xivono u tsutsumile a ya ringeta ku tumbela ntlawa wa vafana lava a va ri karhi va n'wi hleka.

Loko a ha ringeta ku baleka, u khuguriwile hi tintanghu ta yena letikulu, a wa na ntanghu ya yena yin'wana yi haha emoyeni yi nga se wa.



“Ndzi tshikeni! Ndzi tshikeni!” a huwelela. Hi leswi a kota ku vula swona loko a ri karhi a rila.



“Xivono! Xivono! Pfuka!” Xivono a kota ku twa rito ra mana wakwe.

A pfula mahlo ya yena ya mihloti.



“Pfuka se i mixo!”

Hakunene a ku ri mana wakwe.





Xivono u pfukile eka mubedo wa yena a valanga.

A nga ri exikolweni...

A tsakile leswaku a nga ri exikolweni.



Kutani a tsundzuka buruku ya Vonani!

A tsundzuka hembhe liya yo leha!

Tintanghu...!



“Ndzi... Ndzi pandza hi nhloko,” a ti funungeta nakambe.

“Xivono n’wananga, pfuka,” ku vula mana wakwe hi musa, a ri karhi a switiva leswaku u karhatiwa hi yini.



“Languta yunifomo ya wena ya xikolo. Ndzi yi lulamisile”

A nga pfuki, u lo hlometela ehandle hi le hansi ka minkumba ya yena. Exitulwini lexi a xi ri ekusuhi na mubedo wa yena, a ku ri na yunifomo leyi a yi languteka yi n’wi ringana.



Xivono u tsakerile yunifomo ya yena ya xikolo leswi swi nga endla leswaku a nga lavi mana wakwe a n'wi pfuna ku yi ambala, tanihi leswi a swi endlisa swona masiku.

Loko a languta ehenhla, mana wakwe a khomile bokisi.



Ku n'wayitela loko a ku ri kona exikandzeni xa yena a ku hundza mihloti leyi a ringeta ku yi khoma.

“U ndzi xaverile tintanghu manana?”

“Ina Xivono,” ku hlamula mana wa Xivono.

Xivono u vukarhile mana wakwe a n'wi manya.

“Ndza khensa, manana.”



Hinkwaswo a swi ri kahle eka Xivono hi siku ra yena ro sungula exikolweni.

A tsakile.

